



**VNser Philipfen von Gottes gnaden Lantgrauen Z? Hessen,
Grau?[n] z? Catzenelpoge, Dietz, Ziegenhain vnd z? Nidda,
Reformation vnd gemeine lands ordn?[n]g, die wyr mit vnser
lantschafft verordente vnd vnsern fürnembste Gelerten vnd
Predicanten in etlichen sachen vnnd Puncte z? mehrung vnd
besserung voriger ordnung auch Christlicher z?cht,
Burgerlicher Erbarkeiten, vnd g?tes wandels auffgericht
haben, : Auch ordnung vnnd mass wie man mit den
Widdertauffern gebaren, dieselben vermanen, vnterrichten
...vnd straffen soll. Ordnung der Visitation,**

<https://hdl.handle.net/1874/456698>




Unser Philipsen von Goet
 tes gnaden Cantgrauen zu
 Nessen/Graue zu Carzelnpogel/Diez/Ziegen-
 hain vnd zu Lidda/Reformation vnd gemeine
 lands ordnung/die wyz mit vnser lantschafft ver-
 ordent vnd vnsern fürnembste Gelerten vnd Predicanten
 in etlichen sachen vnd Puncte zu mehrung vnd besserung
 voriger ordnung auch Christlicher zucht/Burgerlicher Er-
 barkeiten/vnd gutes wandels auffgericht haben/Auch ord-
 denung vnd maß wieman mit den Widdertaufern gebaren/dieselben
 vermanen/vnterrichten/zü der Chastlichen Kirchen vnd gemein/die so sich
 auß gnediger verlehung Gottes vnd guten vnterricht vnd vermanung
 von yrem Irzal/bekeren/wider annemen/Vnd die halstarrigen/mütwil-
 ligen versüer vnd widder Christen/verweisen vnd straffen soll.



Ordnung der Visitation/

Gedruckt zu Wapburg durch Eucharium Nyrborn
 Anno 1537.



Dieß ist die Beschreibung der
Königlichen Bibliothek zu
Wien. In welcher alle die
Bücher und Handschriften
welche die Kaiserliche
Majestät in Wien hat
ausgewiesen. Und die
Zahl der Bücher in jeder
Classe angegeben. Und
die Namen der Bücher
in lateinischer Sprache
aufgeführt. Und die
Zahl der Handschriften
in jeder Sprache
angegeben. Und die
Namen der Handschriften
in lateinischer Sprache
aufgeführt. Und die
Zahl der Bücher in jeder
Classe angegeben. Und
die Namen der Bücher
in lateinischer Sprache
aufgeführt. Und die
Zahl der Handschriften
in jeder Sprache
angegeben. Und die
Namen der Handschriften
in lateinischer Sprache
aufgeführt.



Wien in der
Königlichen Bibliothek
am 1. 1. 1.



Wyr Philip von Gots gnaden
Landgraue zu Hessen/Graue zu Carzeln
pogen/Dietz/Siegenhain vnnnd Niddarck.
Entbietet allen vnd yglichen vnsern Land
sassen/vnderthanen/verwäten/vnd lieben getrewen/beiden
Edel vnd vneddel/Geistlichen vnd weltlichen stands vnser
gnad vnd alles güts züuoꝛ/ fügen vnd thun euch hiemit
zú wissen/ Nachdem sich in vnsern Fürstenthumben/ Lan
den vnnnd gepieten/ vber die Ordnung so wyz vormals ges
macht vnd vßgehen lassen haben/ mancherlei vnordnung
vnnnd vnshiglicheit erhalten/ sich auch die böße Sect der
Widdertauffer hien vnd widder ereugt/ da sie vber vnser
verpot/rotten vnnnd versamblung machen/ also das zübe
sorgen ist/ das sie der Monsterischen vnd vielen anzeigun
gen nach wie sich etlich viel Land/ mit brannd zübeschedi
gen/ vereinigt habe/ zü nicht anders/ dan/ nach vßfür vnd
vnrath trachten/ Derhalben die hohe notturfft erfordert
vnser vorgemachte Ordnunge züerbessern/ züerklern/
oder gegen den Widdertauffern pilliche wege/ damit dens
selbigen geweret/vnnnd anndere dauonn abgeschreckt wer
den mügen/ furgünemen/ Zü dem das wyz vnns als eyn
Christliche Oberkeit/vnners Ampts halb vor Got schul
dig erkennen/ das vns zü zusehen vnd zürathen gepurt/ das
die irende schaffe/widerumb vß die rechte ban/ des Euan
gelij vnnnd der warheit pracht werden/ damit Gottes reich
gemeret/ sein heiliger Name geeret vnnnd gepreiset werde/
Wiewol wir dan bißhere darin auß Christlichem mitleid
lichen bedecken langmütiglichen gehandelt/ Diweil dan
dorin kein besserung gespürt/ So haben wyz auß Fürstli
cher gnediger milter sorgfeligkeit nit wollen vnnderlassen/
nachfolgend Ordnung vnd erclerung verfasst vnd vßges
richtet/vnd dieselbig yderman zü wissen zü thun bedacht.

Beuelhen heissen vnd gepieten demnach abermal mit
ganzem Ernst/das ein iglicher vnser verwant/Land
sassen/vnd vnterdanen/was stannds oder wesens der ist/
solche vnser ordnungen vnd satzügen in allen iren artikeln
vnnnd puncten/also halten/deren iren einhalts nachkomen
vnd geleben/bey dem gehorsam den sie vnns als iren von
Got geordneten vnd furgesetzten Erbherren Lanndsfür
sten vnd ordenlicher obrigkeit schuldig vnd pflichtig sein/
vnd bey den straffen/die hierin gemelt werden/vnnnd so ein

mitwilliger vnd freudlicher mehrmals vnnnd vielfaltig dorin
bruchig wurde/ da wollen wir mit weither vnnnd schwerer
straff zu abschew d andern vngnediglichē vnd vnnachleß/
lichen nachfolgē/ Vnd dan allen vnd yden vnsern Stathal
tern/ Oberamptmannen/ Amptmannen/ Kenntmeistern/
Kelnern/ Schültheissen/ Rentschreibern/ Vögten/ Land/
Knechten vnd beuelhabern/ by vermeidung vnser schwerer
vngnade vnd straff/ das sie fur sich selbst vnnnd alle die zren
diffe vnd andre vnser furaußgangē ordnung halten/ Auch
also bey jnen auch zu yren Ampten vnd vnderthanen/ vnd
alle denen die solche vnser ordnungen/ sazungen vnd ge/
botte begreiffen/ gestrackts handthaben/ vnd dero nachfo
men vnnnd geleben/ on nachleßigkeit/

Erstlich vnd ansenglich nachdem vns vnd allē vnsern
Landsassen/ vnderthanen/ vnd verwäten/ das so die Ehr
Gottes/ mehrung seins Reichs/ besserung des nechste/ vnd
also vnser selen seligkeit vnd ewige wolart belangt/ pillich
zum höchsten vnd vor andern allen angelegen sein soll/ als
da furnemblich ist/ das sein heiliges allein seligmachende
vnd gnadenreich ewiges wort/ rein vnd lauter nach rechter
Biblischer schrift werde gepredigt/ vnd zu furderung dessel
ben/ die Pfarren mit rechtgeschaffenen/ wolgelarten/ fromt
men/ Gotsfurchtigen Euangelischen predigern versehen.

Zu dem das wir angemirckt vnd erkät haben/ das aus
vngeschicklichkeit der Pfarhern/ vnnnd das/ das wort Got
tes an etlichen ortern die nit on mittel allein vns zustehen/
mit rein vnd lauter wirdet gepredigt/ sich viel vngeschick/
lichkeiten/ vnd sonderlich der Irzal der Widderteuffer/ erhe
ben/ vnnnd der leuthe gewissenn Irig gemacht werden/ da
durch sie dan in solche Irzal fallen/

Darumb so ordnen gepiet vnd wollē wir das alle vnd
yde Pfarrer/ sie seien vnser lehen oder gehen vonn Edel/
leuten oder andern zu lehen wer die seien/ des gleichen in d
Edelleut eigen dorffern/ mit rechtgeschaffnē/ wolgelarten/
Euangelischen/ Gotsfurchtigen/ frommen Predigern vnd
Pfarhern werden versehen/ vnd das man die Pfarhern so
man auf ein pfar setz/ wil alwegen einem yden Superin
tendentē/ desselben zircks zuuor zuschicke zu verhören/ vnd
so ynen der tuglich erkent/ das er dan vff dieselb pfar werde

geordnet/wie wir in der ordnung der pfarbestellung halb
daruon gesetzt haben/ Wirdet er aber durch vnsern Su-
perintendenten vor vnduchtig vnd vnzuleffig geacht/ So
sol er auch vff solche pfar nit gesetzt/sonder ein ander tuglic-
her bestellt vnd angenommen werden/ Doch alles mit der
maß vnnnd ordnung/wie vnser Ordnung in denselben sa-
chen daruon melden/

Zum andern/das in allen vnsern Pfarren/Kirchen/ alle
Predicanten vnd Pfarrer/das volck trewlich erinnern/got
vnsern himelischen barmhertzigen vatter/ernstlich/vleissig
vnd embzig vñ hertzen anzuruffen vnd zü bitten/das er al-
ler Widderteuffer vnd irigen hertz/bekeren vnd erleuchter
wolle/sich von sollichem irsal zum rechten verstände vnser
heiligen Christlichen waren vnnnd rechten glaubens/Auch
zú vnser Christlichen einigkeit vnnnd gemeinschafft züwen-
den/Vnd solich pitt sol nach yder predig/widderholt vnd
repetirt werden/

Man sol auch bey peen fünf schilling gebieten/das vn-
der 8 Predigeniemants vff dem Kirchhoffe od am Markte
müßig stehe/andern zü ergernus/Vnd welcher das vber-
füre/den sol man darumb/wie obgemelt/straffen/

Vnnnd nachdem viel clagens ist/vom Gebranten wein
schencken vnd drincken/ So wollen wir das vouge vnser
ordnunge vom Gebranten wein/strags vnd strenge gehal-
ten werden/Vnd wa die Stett den brantenwein in iren kel-
ler mit vnserm wissen genümen haben/da sollen sie disse or-
denung in gleichnus halten/od des schancks müßig steen/
Vnd sollen keinem menschen vff ein mal zü trincken mehr
dan vor zween heller lassen/Vnd welcher schenck das vber-
füre/so oft er das thüt/vmb zehen alb.gestraft werde/Es
sey dan das ein mensch den zü Arzney leuth oder pferden
prauchen wolle/vnd solichs also bey seinē glauben züsaget

Es sol auch kein wein oder bier wirt Sontags od heili-
gen tags vor der predige wein od bier raichen oder verkauf-
fen/es were dan frembden wanderden leuthen/bey peen zes-
hen alb.so oft er das vberfüre/

Vnd nachdem wir hievor viel guter Chriſtenlicher be-
felch/ordnung/vnnd gebot/von Gotsleſterung/flüchen/
ſchweren/spielen/Sauffen/vnd andern laſtern/abzuſtecken/
vnnd wie die geſtrafft werden ſolten/gemacht/vffgericht/
vffgekündet vnd gebotten haben/Vnnd aber dieſelbigen
villicht von euch vnſern Amptleuten/Dienern vnd be-
felhabern/biſhere vberſchritten/vbel gehandthabt/vnnd
von euch den vnderthanen/nicht wie yr ſolt vnnd wir euch
gepotten gehalten worden ſein/Dardurch dan andern chri-
ſten vnd die ſich des Namens rühmen nicht geringer an-
stoß vnd ergernuß gegeben wirdet/So iſt nochmals vnſer
ernſtlich meyning/Gebieten vnd wollen/das alle vnd yde
vnſer ordnung/ſatzung vnd gebot/die wir von derwegen
gemacht vnd vffgericht haben/vnd noch vfrichten od ma-
chen werden/Ernſtlich vnd veſt gehäthabt/vnd darüber
gehalten werden/Vnd ſonderlich ſo ſol man in vnſern Für-
ſtenthumben/Landen vnd gebieten/kein Spiel in offnen
märkten/in wein oder bierheusern/in holtz oder ſelde/oder
auch ſonſt heimlich Spiel der Burger/Bawern oder ge-
meinen Wann nicht geſtatten/bey Peen fünfſſ gulden von
einem yden der da ſpielt/vnd der da zuſicht/od dabey ſi-
tzt/od iſt/vnnachleſſig zübezalen/Vnd Jr vnſer Ampt-
leuth/Diener vnnd beſelhaber/ſollet ein vleiffig/trewlichs
ernſtes vff vnnd inſehens haben/das ſolich Peen inpracht
vnd vnns verrechnet werde/Vnd in wilchs Wirdshauß
daſſelbig zügeſehen vnderſtanden wirdt/der ſol ſchuldig
ſein/ſeine Geſte/daruor trewlich vnnd vleiffig züwarnen/
vnd ſo ſie daſſelbig nicht vnderlaſſen/ſolichs euch vnſern
Ampts verwalten/einns yderrn ortz als der oberkeit bey
ſeinen Eidspflichten anzüzeigen/Vnd ſo er das nit thüt/
die Peen duppell/Vemlich zehen Gulden vnweigerlich zü
ſtund geben vnd bezalen/Wilcher auch bey ſolichem ſpiel
iſt/das weis vnd nicht anzeigt/der ſol zwen Gulden züge-
ben ſchuldig ſein/Vnd in welcher Stat zü offenemärcket/
on vnſer wiſſen/offen ſpiel gelitten wirdet/dieſelb ſol auch
zwenzig gulden zügeben verfallen ſein/Vnd vnſer Ampt-
leuth/Diener/vnd beſelhaber eins yden ortz dieſelb Peen
onuerzuglich inpringen vnd vnns verrechnen/

Vnnd ob einicher Wirdt/in einiger vnſer Stat oder
Flecken/sagen wolt/er wer dafür gefreiet/das er es nit anſa-
gen ſolte/So ſoll dieſelbig freiheit hiemit vffgehoben ſein/

vnd gleichwol mit der Peen segen yme fult gefaren werden)

Wo einer der da Got leset/den Namen des höchsten mißbraucht/schweert oder flucht/gehort wirdt/Derselbig sol auch so oft er das thut/zehen alb. zugebē verfallen vnd schuldig sein/Vnd wo das die hörer nit anzeigt vnd auch an gericht nit rügen/so sol ein ygllicher so oft er das verthelt auch soviel zugeben verpflichtet sein/vnd welcher es antgelt nit vermag/der sol darumb eins ydermals/vier tage vnd nacht im thorn oder gefencknis sitzen vnnnd behalten werden/Vnd damit sollen alle flüche vnnnd schwüre/darin Gottes name vnerlich genent wirdt/gemeint sein/ Inmassen vorige vnser ordnung solichs weiter vßweysen/

Ferrer/Nachdem wir vormals von wegen des züdrinckens/zü vollen/halben/vnd gleichmessigen truncken/in vnser ordnung gnedige vnd Christliche warnung gethan haben/mit d. vorgewissigig/das wir solich zütrinken mit gemessen truncken zü vnser gelegenheit ganz verpirt wollen/vnd dabey gehofft hetten/es solt solich züdrinken abgenommen/vnnnd vß anweisung des Gotlichen worts/ein yder sich selbst gezogen vnd gemessigt haben/damit darvff Peen zü setzen one not gewesen were/Vnd aber solichs nicht allein nicht abgestellt wirdet/sonder ye lenger ye mehr inreisset vnd zünimpt/dardurch onezweiuel got erzörner/theurde/mißwachs/franckheit/vnd andere pilliche straff vns züsendet vnd vfflegt/ Auch dem Euangelio ein grosser mürglicher anstos begegnet vnd widerferet/Vnd demnach so dringet vns/als die verordent Oberkeit/vnser gewissen vnd gottes ehre/solich züdrinken/bey namhaffrige Penen züerbieten/als wir hiemit thün/Setzen der wegen vnd ordnen/das niemand dem andern gemessen truncke/zü vollen/halben/od zü gleichen züdrinken/noch einiche vom andern gleichen drunck oder bescheit/weder offentlich noch heimlich fordern oder warten/Desgleichen keiner den andern nöthen oder dringen solle/damit gleiche truncke gescheen/wie das vorige vnser ordnung von vnmissigem züdrincken vffgerichtet/weither vßfüret vnnnd specificirt/Sonder wilcher von vnsern Amptverwaltern/Beuelhern/Kentmeistern/Schultheissen/Vögten/Amptknechtz/Burgern/Bawern vnd andern vnderthanen Geistlichen oder weltlichen/Gelert oder vngelert die nicht vom Adel

sein/solichs vberfüre/so offte er das there/der solt vns zehen
alb. zü büß zügeben verpflicht/Vnd der Wirt/Burger/
Bawer/od Hausman/so solichs in seinem haufe gestat/
rete vnd nicht anzeigte/ Der soll so offte das geschicht zehen
Gulden zü büß geben/Auch ein yder der dabey sizet oder
ist/das solichs geschicht/zehen alb. in gleichnuß zü büß zü
geben schuldig sein/Vnd wilcher Amptman/Beuelhaber
od Amptknecht/wie die Namen haben/in vnserm Ampte
seiner verwaltung oder befehl/darauff nicht achtung gibt/
oder so er es weis nicht strafft/der sol mit zwanzig gulden/
darzú entsetzung seins Ampts verfallen sein/nach vnserm
ansehen vnd gefallen/ Die vom Adel aber/wo die soliche
vnsrer ordenung vberfüren fur ire person/die sollen inhale
voriger vnser ordenunge auch gestrafft werden/vnd gleich
wol der Wirt oder Hausman in welchs hauff solich zü/
drincken geschee/dasselbige nicht gestatten/noch wein oder
bier in der gestalt geben noch verkauffen oder hollen lassen/
sonderlich wo die vō Adel mit andern/Burgern/bawern/
oder gemeins leuthen sessen/Were aber das gantze geloch
vom Adel/so sol der Wirt oder Hausman in geheim sie
gütlich warnnen/Vnd so das nicht hülfte/solichs d Ober
keit/Amptleuten/Amptknechten oder beuelhabern/Eins
yden orts/vnd dan dieselbigē beuelhaber/solichs forter an
vns gelägen zülassen schuldig sein/ Weren aber frembde
leuthe da/denen zün ehren etliche vō Adel ynen geselschafft
leisten wolten/das sol auch also anngesagt werden/damit
wir darju nach gelegenheit der Personen/ gepürliche versee
hung thun mögen/Doch behalten wir vns hierjn befur/so
wir wurden befinden/das diß vnnsrer satzung beim Adell/
nicht helfenwolt/hieruff andere ordenung zümachen oder
Peen züsetzen nach gelegenheit/Vnd welcher vnser Ampt/
man/Amptknecht/Beuelhaber oder Diener solichs nit al
so anzeigte/der sal auch sein gepürliche straff darumb em
pfangen vnd der gewertig sein/ Findtman aber einē bur
ger/bawer oder gemeinen man/der nicht vom Adel/d offte
vol ist/das er vngeschickt würdet/den sol man auch darüb
furnemen/vnd zimlich nach gelegenheit straffen/Vnd so
er in der vollen weise etwas vbertritt/sol er duppel gestraffe
werden/

Item so sol die satzung der Kindeauffhalten in aller
form/mit geschenck vnd gastung/gehalten werden/wie die

gesagt vnd geordnet worden ist/vnd des weiter erclert sein/
das die Acht personen des andern tags oder so die Kinde
trauff am Wittage gewesen were/des Abens/nicht widder
geladen werden/oder so sie geladen wurden/nicht Kommen
bey Peen. iij. lb. Desgleichen so sol man bey gleicher Peen/
hernachmals Geuatterschafft oder Kinndtrauff halben/
kein gastung anrichten oder halten/es sey in des der das
Kinndtrauffen oder in des geuatter hause/

Der Artikel der Hochzeit/sol mit der zal der Perso-
nen zuladen vestiglich gehalten werden/Vnd sol darnber
ein igkliche Braut/vber zehen Megde/vnd der Breutigam
vber zehen Knechte/gesfreundt oder vngesfreundt/geladen
oder vngeladen/nicht haben/staden oder zulassen/

Vnd als in voriger vnser ordnung gesagt/das braut
vnd Breutigam/vff den abent drey Tisch/vnd den morgen
des andern tags auch drey Tische laden mogen/vnd dar/
uber nicht/dasselbig sol ganntz vnd zumal abgestelle sein/
Vnd so man des ersten Braut tags/die Braut vō Tanze
hinbringt/so sol darnach vff den abent/kurtz vmb/kein
Tisch mehr gehabt oder geladen werden/sonder ganz ab/
gestelt sein/vnnd ein yder widder in seinem hauß leben wie
vor/Noch weniger des andern morgens/alles bey Peen in
der vorigen Ordnung vffgesetzt/

Vnd sonst in allen andern sellen/sol vnser ordnung
inmassen die vßgannngen ist/stracks gehalten werden/one
nachlassung/

Daneben vnd damit solichs desto star vnnd voln/
Komlicher gehalten werde/So wollen wir einen Fiscal zu
Cassel/vnd einen zu Wapurg/verordnen/der neben euch
vnser Amptleuten vnnd Knechten/Burgermeistern vnd
Rath daruff sehen/vnnd was nicht gestrafft desgleichen
wilcher laß ist/vnsern Obern Richtern antzeigē sol/wie sich
gepürt/Vnnd solicher Fiscal sol ein vierdentheil haben an
alle Büßen/die er inpringt/wie die durch vnser Ober Rich-
ter gedinget wirdt/

Es soll auch kein vnser Amptman / Rentmeister
oder Diener/macht haben/Büße zu myltern oder nach zu

lassen/so an vnsern gerichtten gewiesen ist/sonder die stracks
im nechsten vierthel Jars nemen vnd inpringen / wie die ge
wiesen wirdet / vnd wilcher nit hat am gelde in alle büßen/
der sol mit seinem leibe bezalen / vnd vff seinē eigen kosten
sitzen / nach gelegenheit der person vnd sachē / wie das iz vn
ser Amptleuth vnd beuelhaber fur gut ansehen werdet /

Wilcher aber an vnserer gnade gewiesen wirdet / vnd
kein gemessen büß het / das sollen die Amptleuth vnd Be
uelhaber nach gelegenheit messigen vnd nemen / vffgeschet /
den grosse schwere sachen / leib / lebē / eyde / malefiz / vngheor /
sam / vffriir oder dergleichen antreffende / dieselbigen sollen
an vns pracht werden / Vnd wilch Ampt kein ordnung
het in der püß / das sol an vnsern hoff alhie ansuchen / dem
sol man ordnung geben vnd machen /

Item die weil von den müßigen Leuthen ein grosser
mißbrauch geübt wirdet / mit dem steetent oder langen zeh
chen / in Bier oder wein / van Burgern / Bawern vnd ge
meins Leuthen / So setzen vnd ordnen wir / das kein wirt
er sey in Stetten oder Dorffern / der schenck auch Bier oder
wein / Desgleichen kein weinkeller / Burger / bawer oder an
der man / am werckeltage / lennger zech halten sol / dan nach
mittage von drey vren an / bis vff fünff vren / eingeschlos
sen / vnd wilcher das vbersüre / der sol vns einen gulden zu
büß / vnnachleßlich so oft er das thüt / geben /

Es were dan das ein frembder oder Bawersman in
die Stat / oder ein frembder vffs dorff gewandert kompt /
dem mag man vmb sein gelt / zimlich essen vnd drincken ge
ben / Hierin ist aber niemans verpotten / in sein hauß nach
seiner notturfft / Bier oder wein zuholen / doch das er die zeh
che nit anders halte / dan wie obgemelt /

Aber vff den Dorffen durch auß / sol der Wein wirdt
des werckel tags kein wein zech von Bawern halten / Es sey
dan das ein frembder / Dan gewädert kompt / dem sol man
wie gemelt vmb sein gelt essen vnd drincken gebē / vffgeschet
den in landen des Rheins da kein bier ist / da sol man den
wein / doch obgemelter ordnung gemess / zulassen /

Vnd darumb so sol auch kein Schülteis od Ampt /
Enecht / in allen vnsern gepieten / keinen Weinschanck / in key

nen weg haben oder üben/ Sonder ob einer oder mehr/ in
yrer bestellung/den weinschäck herren/die sollen vns solichs
anzeigen/vnd dargegen so sie bleiben wollen/zimliche ver-
gleichung nemen/

Nachdem sich auch ein zeitlang/wie obgemelt/ein
frembde Secten der Widdertauff in vnsern landen vnnnd
gebieten/erengert vnd heimlich vndergesleufft haben/dero
wegen wir hievor mehr dan eine ordenung gemacht ha-
ben/So wollen wir das soliche ordenung/mit vorweisung
vnd andern sachen/stract. gehalten werden sollen/Dieweil
dan soliche Sect/von wilcher man zu Nonster viel grau-
samer dinge gesehen hat/vnd täglich noch viel böser furne-
men mit bräde vnd andern heret/keins wegs zügedulden
ist/So wil nochmals die notturfft erfordern/darin züses-
hen nach gelegenheit der sachen vnnnd personen/

Damit dan yderman grundtlich vnd eigentlich ver-
steen möge/Dweil die person yr glaube vnd verhädelunge
nicht gleichmessig sein/sonder ein glaube irziger vnd schwe-
rer ist/dann der ander/Auch ein furnemen schwerer vnnnd
größer ist/dan das ander/wie man darinne handeln vnnnd
procediren/so sol man nachfolgenden vnderschied halten/

Anfenglich setzen wyz vor ein vn beweglichen grunde
Das alle vnnnd yde person beider geschlecht/so von Kindt/
tauff nichts halten/yr kinder nicht reuffen/oder sich wid-
derumb tauffen lassen/

Welche auch halten oder glauben: Das ein Christen
man/nit Weltliche/erbliche Oberkeit/haben oder tragen:
Zü felde ziehen/das vatterläd retten/od beschyrmē helfen:
Die widderwertigen vnd bösen straffen: Gerechte Kriege fü-
ren: Zinse vnd Zehenden nemen vnd geben: Rechtmessige
vffgelegte Eyde/schweren möge/

Item welche von der Menschwerdung Jesu Christi
vnsern Heilands anders/dan das Christus von Marien
blüt/durch wyrtlich des heiligen Geistes/die menschheit an
sich genummen habe/haltet: Nach der tauff vergebung &
rödtünde: Verneyne vnd versage alle güter gemeyne/vnd
demassen geschickt sein/das einer one des andern willen/
die angreifen vnd prauchen möge/

Item welcher glaubt od heldet/das ein chriſtē mā auff ein mal mehr dan ein eheweib haben möge / od one wiſſen der Oberkeit od vmb des glaubē willen / ſein eheweib verlaſſen vnd ein andere nemē möge / vñ andere dergleichen articel ſo zū Wünſter widd die ſchriſt gelert wordē / dieſelbigen alle / ſren im glaubē / vñ ſeint in vnſer Chriſtlichen gemeine nicht zūgeduldenn / wie das alles hievor durch götliche ſchriſt widerlegt iſt / vñnd nachmals leichtlich widerlegt mag werdenn /

Item welche vnberuffen predigē / vnd heimlich verſammlung in walden / wüſtenügen oder einzeln heuſern machen / oder ſolche verſammlunge wiſſentlich beſuchen .

Item welche halten das kein weltliche erbliche Oberkeit ſein ſollen

Item welche der Oberkeit nit gehorſam leiſte / Des gleiche ſo ſie proſcribirt vñ verwieſen werden / ſrer eide vergeſſen / od ob ſie die gleich nit gerhan hetten / widerkemē vnd ſolich gebott vbertretē / dieſelbigē ſollē in die Kaiſerliche Edicta vñ ſolichen verſammlungē vñ vngheorſam ſagende / Nemlich das ſie mit dem ſchwerdt gericht mögē werdē / gefallē ſein /

Vnd demnach ſo ein mēſch / es ſei ſraw od māſ perſon mit einē od mehr der obgemeltē Artikel halben verdacht wirt / derſelbig ſei vnder vns oder den vnſern vom Adel od andern geſeſſen / Damit dan gegen demſelbigē vnordēlicher weiſe nicht gehandelt werde / ſo ſol ynē der Pfarher yfflich vor ſich fürdern / vñ ynn ſambt zweien oder dreien od viern gelertē Pfarhern vnterſtehen zuberichten / wo ſie ynē dan nit berichten mügen / als dan dem Amptmann oder Amptknecht od ſeiner Oberkeit des wechſ anzeigē / So haben wir auch zū Werpurg / zū Caſſell / Eſchwege / zū Darmſtat vñ Sant Gewehr / vnſer Superintendentē vnd geiſtliche verordēt / vor dieſelbigē vñ vnſere Rāthe an ydem ort durch die amptleute / amptknechte od yr Oberkeit ſollen ſoliche verdachte perſonē gefenglich od ſonſt leiſtlich geführt od pracht werden / nach gelegenheit einſ yden zirck / dieſelbigē Superintendentē vñ vnſere Rāthe ſollē ſoliche verdachte perſon verhören / vñ ſo dieſrig erfundē wirt / mit allen vnd höchſtē vleis in aller gütigkeit zuberichten vnd erſteen / vñ ſo ſich dan befinde das ſoliche perſon / vom

nen ythüm absteet vñ sich berichtelesset/dem sol ein schriftliche Remission widderüb in sein gericht/stat/platz/ an die Oberkeit vñnd pfarrer gegeben werden / darinn vermeldet das er sich bekeret habe vnd büß thün wölle / vnd sol seine jethüm vor der Christlichen gemein die er vormals geer / gert hett/bekennen mit anzeigung / das er widder in vnnsere gemein getreten sei/ vnd sich darin als ein gehorsamer halten wölle/vñ daruff sol die selb person von der gemeine widderumb vsgenomē werden/vnd vor sie ein gemeine vorbit vnd dancksagung gegen Got geschehen/

Wirdet aber die person nit irrig erfunden/ sol man sie gürtlich tractieren vnd verlassen one beschwerung zūhause ziehen/

Trüge sich aber zū/das ein person ein mal oder zwei abgestanden were / vnd viele widderumb / vnd wurde danoch widderumb berichtet / das sie sich zūm andern oder dritten mal bekeren wolt/dieselbige person sol etwas / nach vffsagung der Superintendenten vñnd der Oberkeit des orts dahien sie pracht wirdt/ In alnüssenn Fastenn gebenn Armemn leuthen/ doch nach gelegenheit der person/ vñnd yrer gütter / auch derselbigen weib vnd kindern /

Wileher sich aber nit bekeren oder berichten lassen wolte/vnd halßstarrig were/ Ist dan dieselbige person frembd vnd im lande nicht sesshaftig/vñnd hat geraufft oder versamblung gemacht / one wissen der oberkeit oder versamblung ersücht/ So sol dieselbig person/mit Rütten außgehawen vnd yz ein zeichen an einen backen gemacht / vñnd der vffgelegt werdenn / das Landt zūuerschwerenn / ader zūraumen vnd ewiglich darin nicht zūkommen/ bei peen/ des lebens zūuerlierenn / Vñnd solichen abschiet/ sol man yrem Amptman da sie sich gehalten hat/ in schriften zūerkennen geben/ ader alsbalt am ort examinis / exequiren vñnd vfrichten nach gelegenheit der sachen/ Were aber solche person vnderm Adel in yren gerichtenn / da sie hohe Oberkeit hettē/begriffen / So sol man inen die person widderschickenn vñnd den Recess yrer straff vñnd verweisung darneben/darmit sich der gerichtsherre/darnach wisse zūhalte/ Vnd dasselbig sol auch der gerichtsherre also zūeye

gütlich schuldig sein / Auch dorüber nit härter straffenn /
vnd wo er das nicht theet / vonn vns darumb angesehen
werdenn /

So dan solliche frembde person / one wissen widderköpft /
vnd solich proscrition vnd gebott verbricht / Diweil wir
dann in vielfaltigem trefflichem rathe bestundenn / das die
weltliche Oberkeit / zu solichenn freuelichenn vfftrüschenn
Leutchen / in dem sal mit dem schwert richtenn möge / So
sal man sie vor das weltlich peinlich recht stellen / vnd yr vff
diffe vnser Ordenunge vnd die Keiserliche gesetze / ergehen
vnd gescheen lassen / was recht ist /

Desgleichen sollen die vom Adel auch thun / vnd soll
sine solichs an yrer gerechtikeit vnshedlich sein / auch sonst
in andern sachen keinen eingang machen /

Doch sol man keinen widdertauffer / wan schon das
vrtel ergangen ist / töden / man sols vns zuuor anzeigen /

Hett aber die anflendische person / nicht getaufft / ge
predigt / ader versamblung gemacht / vnnd were villicht
selbst vff einfaltverfirt / wölt sich aber nicht berichte lassen /
So sol man sie mit Rütten zum erstenn mal nicht auß /
streichenn sonder sonst wie obgemelt / des Lands ewiglich
verweisen / mit vfflegung so sie widder keme / das sie alsdā
am leibe gestrafft werden solle / Vnd so sie zum andern mal
widderkumpt / sol sie mit rütten vffgestrichen vnnd ein ze
ichen an einen backen gegeben werdenn / Wit vfflegung so
sie zum dritten mal widder keme / das sie alsdan am leibe
solle gestrafft werden / Vnd solichs sol auch in dem sal also
gescheen / alles nach form vnd Ordnung im nechsten Ar
tikel vermeldet /

Wurd aber ein solich mensch in beidenn fellen in zeit
differ not / so es sehe das es sterben müste / widderrüffen vnd
wolt sich bekerē / den sol man widder einfuren vnd darnach
im selbigen mit rath handeln / vnd yn nit dötten /

Were aber die person in vnnsern Fürstenthumbenn
Graffschafften / Landen vnd gepieten gefessen / vnnd wer
ein Prediger ader tauffer / hett auch volck vorsamlet / vnd
möcht nicht bekert werdenn / demselbigen sol man vfflegen

alle vnd yde seine güter zuuerkauffen / Vnd so er das nicht
thet in bestimpter zeit / So sollen vnser Amptleut / diener
vnd Besselhaber / die heuser zuschliessen / fewr vßgießen /
die güter verkauffen / das gelt hinderlegen / bissolang der
Widdertaufer solichs fordert / alles laud voraußgägnere
Ordnung (Wiltche aber kein güter / hauß ader hoff habē /
darf man disses wegs der güter verkauffung halbenn nit)
vnd inre vßlegen bei peen der leibstraff / das Landt ewig/
lich zümeyden / vnd so er züm andern mal widderkumpt /
mit ruten außgestrichen / vnd inre ein zeichen im antlitz
gebrant werdenn / Kombt er darnach züm dritten mal
widdere / so sol er ans gericht gestelt werdenn / alles nach der
form / wie im Artikel oben gemelt vnd denē vom Adel an
yzer herprachten hohen gericht parat one schaden /

Vnd so einer ader mehr also würdē verwiesen / vnd inre
vßgelegt bei peen der leibstraff / das Landt ewiglichen zümeyden / die vber solich verweisung im Landt pleibē vnd
nit reumen woltenn dieselben sollen auch mit ruten vßge/
strichen vnd inre ein zeichen ins Antlitz gebrant werdenn /
kumpt er dan vber solichs alles widdere / so sol er ans gericht
gestelt werden / alles nach wie im nechst obgezeichneten Ar/
tikel gemelt wirdet /

Were aber die person in vnserm Lande gefessen vnd
bett nicht gepredigt / getaufft oder versamblung gemacht /
Sondern were vß einfaltigkeit versuret / mit derselbigenn
sol man mehr mitleidens haben / Derselbigenn person mag
man ein Monat zeit bedenkens geben / yren pfarrer vñ die
gelerten züm Consuliren / sich berichten zülaffen / vnd wo das
nicht geschec / oder das sie sich dadurch nicht bekeren wolt /
Ir alsdan vßgelegt werden / wie obgemelt / yre güter zuuer/
kauffen / vñ wo sie das selbst nicht thet / durch vnser ampt/
leuth vnd beselhaber / wie obgemelt / eyequirt werden / In/
massenn solichs die alle vnser Ordnunge vßweiset / mit
verwarnung der leibstraff /

So aber disse person / auch züm andern mal widdere
keme / sol man sie mit ruten außstreichenn / aber durch die
backen nicht brennenn von yzer einfalt wegenn / Kombt die
dan züm dritten mal widdere / so sol sie züm Kerckner ver/
dampt vnd also behalten werdenn / Ob vñ vielleicht got gnad
geben wolt / das sie sich nochmals bekeren wurde /

Wo aber die büß nimmer kommen vnd velleicht die person sich nicht bekeren wolte / So mag man alsdan mit rath darin handeln / wie yme ferrer zuthun sei / damit der hauff nicht zu groß werde /

Vnd darumb so wollen wir dartzu etliche gefengnuß oder beheltnuß bawen vnd zürichten lassen / darin soliche leuthe mit geringer speiße erhalten mogen werden / wie wir das vor das bequemeß vnd best ansehen / Auch daneben prediger verordne / die inen das wort verkundigen / so ferre sie das gedulden mogen / ob Got wie obgemelt / gnade verleihen wolte /

Wolt aber ein Edelman den verdachtenn vß seinem gerichte / nicht an die stett der verhorung schicken / So sol er doch gegen derselbigen personen / mit straff nichts fürnemmen / sonder dem nechsten Superintendenten / auch dem Stathalter oder Oberamptman seines zircks schreiben / yme verstendige leuthe vß seinen costen zugegeben / soliche person zühören vnd zu vtheilen / Vnd so das geschicht / was alsdan durch dieselbigen gehandelt vnd bescheiden wurden / das sol der Edelman also exequiren vnd verfolgen / Doch alles dieser obgemelten Ordnung von der verhorung / verweisung / vnd straff sagend / gemess /

Vnd sol kein Edelman ymands des Glaubens halbon wissen vnd bewilligung der Stathalter vnd Superintendenten straffen /

Vnd sol allewege die maß gehalten werden das die verdachten personen / an die angezeigt ort / zühör gesant werden / vnd so sie sich nicht wolten berichten lassen / wid derumb an die ort do sie here kommen sein / Sonderlich so sie dem Adel vnd andern zugestanden haben zu der execution geschickt werden vnshedlich dem Adel vnd andern an yrer gerechtigkeit / Ob aber vnser Stathalter / Rethen vnd Amptleuthe an orten / des examinis / wurden für gut ansehen / das die execution mit den personē / die one mittel vnder vnns gefessen gewesen / daselbst solt gescheen / das mögen sie auch thun vnd also schaffen zugescheen /

Vnd demnach so sol in disen sachen kein Amptman oder einicher vom Adel für sich selbst richten sond die per /

son also wie gemelt zuerhören vnd iren bescheit zuerlangen / sich befeßigen vnd des also halten /

Vnd nachdem alle person vnd felle nicht gleich sein wie obgemelt / ob sich dann zu trüge das person erfunden wurden / die den obgemelten nicht aller dinge gleich weren / mit denen sol auch nach gestalt der sachen an orten der verhörung gehandelt vnd geschafft werden /

Vnd sol disse Ordnung gegen Eheleuten / wo sie beide der meinung sein / zu gleich gehalten werden / Vnd so sie kinder habenn die zu iren mündigen saren kommen oder verstendig sein / vnd wollen den Eltern nicht anhangen / sondern in vnser gemein pleiben / dieselbig sol man behalt vnd dran sein vnd verschaffen das die güter nach anzahl der person / gleich getheilt werden / vnnangesehen obgemelts Artickels / von verkaffung der güter sagend / wilcher nach disser erclerung sol moderirt vnd verstanden werden /

Weren aber die kinder vnmündig / vnd wolten die Eltern dieselbigen verlassen / So sal man sie auch mit theilung der güter behalten vnd versurmunden / wo nicht / sol man den Eltern die vnmündige kinder volgen lassen /

Wo aber die fraw ader der mann / der widdertauße ader den obgemelten Artickeln nicht anhengig / wil aber mit seinem ehgemabel ziehen / das sol vnd muß man gescheen lassen / wo aber yr eins / der meynüg nicht ist / vnd wil pleibenn / So sol man es mit teilung der güter wie obgemelt pleiben lassen / Doch das eins das ander in vnsern furstenthumb vnd gepiete heimlich nicht hause / herberge / erze / oder trenne / in keinen wege / wo aber besunden wirdet / das yr eins das and heimlich vnder schleuffet / hauset / herbergt / erzet oder drenckt / alsdan soll dasselb mit verkaffung der güter / auch verwiesen werden / in allermaß / wie oben dauon gemeldet ist /

Vnd vß das disse vnser Ordnung soviel baß gehalten werden möge / So setzen vnd orden wir / das bei vngnediger straff / in vnsern Stetten / Dorffern oder gebietenn


Niemands zu Burger ader Vnderfassenn / vnnnd wan er
schön vß dem nechsten Dorff kompt / vßgenommen wer-
den sol / der seins herkommens vnd wesens nicht güte kunt
schafft hert oder mit pringt / Doch handtwercks gesellenn
vnshedlich / auch sollen yre meister achtung vff sie haben /
was glaubens ader wesens sie sein / vnnnd wo sie argwönig
weren / solichs der obrigkeit anzeigen /


Vnnnd nachdem disse Ordnung nicht mag volkom-
menlich gehalten werden / Es sei dan das mit solichen wid-
dertaußern / niemantz gemeinschafft habe / vnd diewel sie
in vnser geistlichen ader Christlichenn gemein nicht sein /
wollen wir sie auß der zeitlichen gemeine auch schliessen /

Vnd darumb setzen / Orden vnd wollen wir / das nie-
mand / wer der sei / Edel ader Vnedel / ader was stands er
wolle / soliche widertaußer ader anhenger / obgemelter ar-
tikel die als obgemelt verwiesen werdenn / ader so sie nicht
verwiesen / doch offenbar werdenn / ader auch denen die sie
vnterhielt / hauset / vñ herbugt / als das Widertaußer
sein bekant vnd bewust weren / wissentlich nit haufe / her-
berge / erze / trencke / oder inen einichen vorschup thun / sonder
wilcher das vberfüre / der sol gleiche straffe vnnnd peenn wie
dieselbigenn Widertaußer verwirckt haben / vnnnd gegen
ymen mit peen vnd straffe geparet vnnnd gefaren werden / in
aller maß wie gegen den hauptsachern / Sonderlich sollen
sie yre gütter verkauffen / vnd vnser Fürstenthumb / Graff-
schafften / Lande vnd gebiete / ewiglich meiden / ader aber
sonst am leibe ader güte / herriglich gestrafft werdenn / nach
vnsern vnd vnser Oberrichter vnd beuelhaber erkentnus /

Befelhend darauf allen vnsern Ampleuthen vnd vn-
derthanen vom Adel vnd andern ydermenniglichen / das
yr disse vnser Ordnung trewlich vnnnd vleissig hanthabet
vnd exequirt / als lieb einem yden sie / die gemelte peen / an
einem yden ort / gesagt vnd sonst vnsern vngnedigen straffe
zū vermeiden /


Vnnnd damit dem allenhalben also deßastattlicher
nachkommē vnd gelebt werde / vnd sich niemants mit der
vnwissenheit zūentschuldigen habe / So sol men disse Or-
denung alle jar zūm wenigstenn zwei male zū vngebode-
den dingen oder sonst vß der Canzel öffentlich verlesen.





Ordenung wilcher masse hinfür die
Visitatores / Pfarher / vnd yre helffer
Diacon / vnd alle Kirchenndiener ver-
ordnet gehandthabe / vnd im fal / so yrer
einer ader mehr vntuglich / lessig
ader vngeschickt
befunden /
abgesetzt werden sollen /





Nachfollich setzen vnd ordnen wir in
Gottes namen sechs Superintendentent/

Einen zu Warburg/dieser zeit Magistru Adam.
Einen zu Cassel/dieser zeit Joannem Fontium.
Einen zu Allsfeld/izut D. Tielmannu Schnabel.
Einen zu Rotenberg/dieser zeit Magistrum Geor-
gium Wöller.

Einen zu Darmstat/oder in d Graueschafft/izunt
Bernhardum Weigersheim.

Zu sant Gewer/dieser zeit W. Gerhardu Eugeniu.

Dieselbenn sollen vffsehen haben vff alle Pfarhern
vnd Kyrchen diener/sie seien was stands sie wol-
len/in aller herschafft des furstenthumbs zu Hes-
sen/wie hernach gemeldt wirdet/

Vnd nachuerzeichnet sol yglichs
Superintendent bezyck sein/

Ein Superintendens zu Cassel sol haben in seiner auffse-
hung vnd Visitation die ampt/Cassel/Grebenstein/
Immenhausen/Sapfenburg/Tründelburg/Seckern/
hagen/Giselwerden/Schönnberg/Beismar/Lie-
benawe/Ziennberg/Scharrenberg/Wolffhagen/
Nasunge/Güdensberg/Velsperg/Nomberg/Bure-
ken/vnd was darin/darumb/vnd daran leigt/das
vnder die herschafft zu Hessen gehört/

Der Superintendens zu Rotenberg sol in seiner vffschüg
vnd Visitation haben/Rotenberg/Nersfeldt/Vach/
Sünnthra/Schmalkalden/Friedewaldt/Bercka/
Spangenberg/Liechtenaw/Reichenbach/Cappel/
Eschwege/mit dem gericht Beilstein/Welssungen/
Allendorff/Ludwigstein/Witzenhausen/Gleichen/
vnd was darin vnd daran leigt/

Der Superintendens zu Warburg sol in seiner vffschüg
vnd Visitation haben Warburg/Blannckenstein/
Dredorff/Giessen/Königsberg/Stauffenberg/Al-
lendorff vff der Lombe/Kirchein/Wetter/Schön-

stein/Wessenstein/Kauschenberg/Fraunckenberg/
Wolkesdorff/Bartenberg/Rosenntal/Biedencop/
vnd was in der landt art drum vnd dran leigt/vnd
in das fürstenthumb zu Hessen gehört/

Der Superintendent zu Allfeldt sol haben in seiner vffse-
hung vnd Visitation Allfeldt/Nomberg vff der
Dine/Grünberg/Olrichstein/Schottenn/Lüdda/
Stornfels/Siegenhain/Burggemünden/Lawen/
Kyren/Schwarzenborn/Treisa/vnd was drum
vnd daran leigt/vnd in das fürstenthumb zu
Hessen gehört/

Der Superintendent in der Niderngraueschafft sol
haben in seiner vffsehung vnd Visitation die ganze
Niderngraueschafft/Dietz/Eller/vnd was darzu ge-
hört/vnd Nomberg für der höhe vnd Crönberg/

Der Superintendent in vnser oberngraueschafft Catzen-
elnpogen sol dieselbige oberngraueschafft vnd die
herschafft zu Epstein in seiner vffsehung vnd Visi-
tation haben.

Von wem die Superintendenten

zu welen vnd zübestetigen seyen/

Wo der Superintendent einer thöds oder anderer sa-
chen halben abgienge/sowil vnser gnediger Fürst vnd herr
alle Pfarhern/in jztgemeltes Superintendenten Zirck ges-
hörig/sordern lassen/oder den nechstgeessenen Superinten-
denten zweien solchs zügeschehen beuelen vnd anhalten/
das sie/die Pfarhern/auß ynen allen/drey Pfarhern dessel-
ben zircks/darin der so abgangen were gehört hette/vnd
sie hier zü am tuglichsten achten / fürschiagen/vnd die sel-
bigen drey / den Superintendenten schriftlich oder person-
lich züschicken / also das dieselbigenn Superintendenten
als dann/einen auß den dreyen welen/vnd wilchen also die
Superintendenten welen/sollen sie fürther an vnsern gne-
digen S. vnd H. schicken mit yren gepurlichen schrifftentz

Vnd zeugnissen/ vñ hat also volgentz vnser G. F. vnd N.
solchen zū confirmiren vnd deshalb beuelhs brieue auß
gehen zū lassen.

Wo aber seiner F. G. auß redlichen vrsachen bewegt
solchen nicht zū zū lassen/ als dan wil seine F. G. solchs den
Superintendenten widerumb anzeigenn / seiner F. G. ein
andern auß denn andern zweien / so die Pfarhern des be-
zircks benent hetten fürzū schlagen zc.

Wo sichs aber also zūtrüge / das die Pfarhern obge-
melt solche person bey ynen nicht finden noch fürschlagenn
kñthen/ sonder in einem andern zirck sūchen vñnd anzei-
gen müßten/ sal solche person/ wo sie gemelter weiße tuglich
ist vnd angenömen wurt/ von yrem ort an den andern/ da
hin sie further zū uerordnen sein wurdet / commode trans-
ferirt werden.

Was der Superintendenten Ampte vnd beuelh sein/ vnd das sie solchs mit vleys aufrichten sollen.

Es sal ein yeder Superintendent alle vñnd ein yede
Pfarre seines zircks / an dem ort sie gelegen / auffz wenigst
yn zweien Jaren ein mal visitiren / vñnd daselbs sich mit
vleys erkundenn/ erstlich wie ein yeder Pfarher beid in lahz
vnd leben geschickt seye.

Der lahz halbenn sol sich der Superintendent erstlich
in freuntlichem gesprech gegenn einem yedenn Pfarhern in
sonderheit erlernen/ in furwendung etlicher punct vnd Ar-
tikel/ so ist mancherley Rotten vnd Secten zū vnsern ze-
ten streytig machē / als von beider götlicher vnd menschlī-
cher natur Christi/ was gesatz / Sunde Christliche büße /
Euangelion/ vnd Güte wercke seyen oder nicht/ Wie vnd
durch wen die sunde vergeben/ vnd das ewig leben erlangt
werde/ was der tauß vnd des herren nachtmal/ vnd weme
sie mitzū teilen oder nicht/ vnd dergleichē viel andere stücke
mehr/ Wilchs alles am höchsten zū wissen zū leren vnd zū
eraben von nöthen ist.

Zum andern sal der Superintendenten zu weytherer
erfarung der lere / vnnnd wie sich ein yder Pfarher darin ge-
halten vnnnd gebessert / in einer yeden Pfarren da er visitirt /
des morgens die gemein zusamen fordern / vnnnd alda dem
Pfarhern des ortz / eine prediget / des inhalts wie yme der
Superintendenten des abents zu vor angezeigt / thun lassen /
Item seine Kirchen ordnung mit sungen / betten / lesen /
tauffen / des herren nachtmal zu halten / vnnnd der gleichen
selbs in augenscheinlicher vbung / vnd auch sunst yn des
Pfarherns Kirchenbuchlin besehen / Vnd was er als dann
an dem allem straffpar vnnnd zuuerbessern befindet / sal er
ynen nach der predig in geheim freuntlich vntherweyssen / leh-
ren / vnd zur besserung ernstlich ermanen /

Des lebens halben / sal sich der Superintendent auch
vleißlich erkunden / den Pfarhern / nach dem er sein predigt
geschlossen / abtreten lassen / vnd die gemeine fragen ob sie
auch yren Pfarhern in der lere rein oder vnnreyn vermirech-
ten / ob er in seinem lebenn erbar / redlich / vnnnd vnstrafflich
seye oder nicht / Ob er auch bier oder wein schencke / offentlich
tafeln halte / oder besuche / vnnnd dergleichen yme vnge-
purliche hantirunge treibe / Item wie er sich gegen die ar-
men leuthe in seiner Pfarr / im Hospital / Siechenhausen
francken vnnnd dergleichen / auch sein weyb / kinder / vnnnd
haußgesinde gegen denn nachpuren halten .

Dergleichen sal auch der Superintendenten sich des
Capelans vnd anderer Kirchen diener / wo sie seint / erkun-
den / ob sie sich auch in rechtem gehorsam gegen dem Pfar-
hern / vnd yrem dienst gegen den Pfarkindern mit yrem leb-
ben vnd wesen halten zc .

Vnd sal als dann die gemeine durch einen außschuß
zwehn oder drey die geschicktesten mennen einhelliglich vnd
auß einem munde vff des Superintendenten furhalten
vnd frage / bericht vnd antwort geben / damit nicht einern
yeden in gangem hauß zu redenn erlaubt / sonder ein rechtes
bescheidenliche ordnung gehalten werde .

Vnnnd wo demnach etliche geprechen viel oder wenig

Vff den Pfarhern vnd andere Kirchen diener mit warheit
pracht vnd erfunden/ sollen sie ermanet/ corrigirt/ vnd nach
gelegenheit der sachen gestrafft werden

Im fall aber das offentliche erkante laster von eines
pfarherns hauffrawe bei seiner gemein auffundig/ sollen
solichs die pfarkinder in obangezogter masse yrem Super
intendenten zuerkennen geben/ wilcher solchs furter den an
dern Visitatoribus ader den Conseruatoribus vermelden
sollen/ als dan sal man verfüge das solche frawe zimlicher
masse gezüchtiget werde.

Wo sie aber in offentlichem Ehebruch oder Nücrey
begriffen/ vnnnd der Pfarher yzer hauffwirdt sich gegen sie
vnd yederman erbarlich/redlich/ vnd zuchtig gehalten/ sal
sie von dem pfarhern gescheiden/ vnd yme ein andere zün
gen gestattet vnd erlaubt werden.

Wann nun also der Superintendentens sich vmb des
Pfarherns vnd ander der Kirchen diener lahr/ leben vnd
wandel gnügsam erforschet/ vnd was er bey denen mangel
befunden/ gerichtet vnd gebessert hat/ sal auch der Super
intendentens den Pfarhern vmb gelegenheit der Pfarkinder
in yrem abwesen fragen/ wie sie sich geg^e Godt vnd seinem
liebenn wort halten/ ob sie auch vleissig zur predig gehen/
yze Kinder vnnnd gesinde zu Gottes wort vnnnd furcht an
haltenn. Item ob auch vnther ynen seyen die sich vnther
der Widdertauffer lehr vnd bunthnis vleissigen oder bes
geben haben. Item wie si sich gegen dem abentmal Chri
sti/ tauff/ vnnnd furstlicher Ordnung mit yren hochzeyten/
Kindrauffen vnd der gleichen halten/ vnd daran sein/ Das
sie auch gar keine Kirchmess halten/ dann solche wil vnn
ser G. S. vnnnd N. ganz vnnnd gar abgeschafft habenn/ in
massenn sein S. G. derhalben erstlich verbot habenn auß
gehenn lassenn.

Vnd nach dem d^e Superintendentes des alles notturffrig
lich vō Pfarhern bericht ist/ damit er dan auch selbs deren
dinge eigentliche grüntliche erkantnis an denn Pfarhern

deem vernemen möge/sal er sie für sich fordern/vnnd etliche auß ynen es sey gleich jung oder alt/yrre gebet/glauben vnd zehenn gebot ansagenn lassen / vnnd darnach etliche deren stücke vnnd Artickel für sich nemen vnnd fragenn / wie sie diß oder das /iezt im Vatter vnnsere /glauben vnnd zehenn gepotten / dan vom Tauff vnnd Sacrament des fleischs vnd blüts Christi zc. gelernt haben vnnd verstehen/ Dan der gestalt mag er beides des Pfarherns lere/ vnd der Pfar/ kinder vleis auffß aller gewisset erfahren.

Was nun der Superintendent an der Kirchen oder Pfarkindern geprechlich erfundet / vnnd doch nit trefflich ist / sal er als baldt mit güte vnnd aller sanfftmütigkeit nach gelegenheit der sachen corrigirn vnnd bessern .

Was aber trefflich yrtumb in der lahr/ oder leben der Pfarhern / Kirchenn diener vnnd Pfarinder seint/ vnnd das ein Pfarher oder seine Pfarinder nicht für yrtumb zülaffen noch bekennen wölten/ sonder als ein rechtmessige lahr vnnd furnemens achten/ auch also von yederman erkannth vnnd verthedingt haben wölten / wie sich dan itzt an etlichen orthern solcher vnnd der gleichen geprechen begebenn/ die sal der visitator von stund an so bald er solchs erferet/ den Pfarhern weyther zütreiben/ bey verliering der Pfar ernstlich verpicten/ vnnd solchs in dem kunfftigen Synodo anzeigen/das züreformiren/emendiren/vnd corrigiren nach gelegenheit .

Was aber der Superintendent nicht selbs richten noch bessern kann/sal er vnserm G. N. od seiner S. G. Rethen/ Cantzler/ Stathalter/ zc. anzeigen / Vnnd wo als dann der vnd ander der gleichen sachen nicht geholffen werden mag/ sollen zuehn der Superintendenten nach gehaltenem Synodo selbs personlich die Conseruatores / oder aber/ wo dieselbigenn nicht züerlangen/ vnnsere gnedighern selbs ansüchen vnd vmb statliche hulffe bitten .

Es sal auch ein yeder Superintendentens nach dem er in einer yeden pfarren allerley geprechen angehört vnnnd nach möglickeit verrichtet / ein gute predige thün in sonderheit an denen orten / da er der Widertauffer geschmeis vnnnd ander der gleichen geprechen vermirckt / damit das volck durch die einhellige predigt bey reiner lahr / Gottes furcht / vnnnd gehörsam behalten werde.

Von der Superintendenten Zerung /

Es sollen einen yeden Superintendenten nach gestalt vnd gelegenheit seines zircks N. gulden des Jars verordnet werden an einem besondern beneficio oder sünst vff einem closter oder geistlichem gefell / dar von sol er die zerung zu dzeit seiner visitation verlegē / damit er den Pharn vnnnd Kirchen vnbeschwerlichen sey / vnnnd keinen vnkosten mache / vñ hieruon sal er im Synodo rechnung thün / vnd was vbrig ist / sal der visitation zu gut kommen.

Wil aber mangeln / sal mit der verlegung nachgeuolget werden / vnnnd darauß wil vnser G. D. gedencen / also das daran nit mangeln sal.

Es sal aber ein Superintendentens in zeit seiner visitation nicht mehr dann zwey pferde haben / es were dann das er so geprechlich were / das er zu wagen faren müste / so sal er auch zwey pferde oder drey / vnd drüber nicht / fur dem wagen habenn.

Von an vnd absetzung

der Pfarhern.

Wo ein Pfarr mit einem Predicanten zü bestellen / sal kein Superintendentens fur sich selbs allein macht haben einen Pfarhern dahin zü setzen / on der andern Superintendenten verwilligung / Sonder sollen sich die Superintendenten einhelliglich mit einander / wo es also in der eyle zü gehen möchte vergleichen / vnd samptlich / oder wo sie sich

in eyl nicht also kunthen vergleichen / ein yder in sonderheit /
den gemelte Pfar zu visitiren gepart / mit höchstem vleis
nach einem tuglichen mann hin vnd wid / furnemlich aber
innerth alben des lands (so er darinnen zübekomen) on al
les ansehen d person / lieb / gunst ꝛc. erkunden / der kein new
ling nach vnbekant her zükömling / sond in seiner lahr vnd
leben versucht vñ probirt seye / auch solches güte rechtmess
sige vnd vnuerdechtige küntschaftt von seinen nachpuren /
oder da er sich gehalten habe / Vñnd wo solcher furhanden
vnd zübekomen / mag ynen d Superintendentens des zircks
samt etlichen yme am nächsten gefessen Pfarhern vociren /
vnd vff die verledigete Pfarren züm versuch vñnd probir
ung seines wesens ordenenn / Doch züuorden selbenn vol
cirten mit gepürlicher commendation schrift an vnsern G.
F. vñnd N. schicken / das sein F. G. mit fürstlichen beuelly
ynen vff die Pfar schicke / vnd als dan ynen further vff den
nächsten Synodum bescheiden / wo er als dann von denen
so züm Synodo gehörens tuglich erkant / sal er Erstlich
bey warem glauben vñ trewen züsagen / vñ des seine hand
geschrifft von yme geben / nichts neues on wissen vnd wil
len des Synodi furzunemen bey suspension vñnd abwey
sung von seiner Pfar / Vñnd darnach beneben einem beson
dern fürstlichenn beuelch durch zwehn die nächstgefessenn
fromme geleerte Pfarhern mit furgethaner prediget / gebet
vñnd großer ansehenlicher reuerentz / als ein frömer geleerte
trewer diener Gottes der gemein beuolen vnd commendirt
werdenn.

Wo er aber nach versuchter seiner lahr vñnd leben
von denen ym Synodo vntuglich erkant / sal yme gesagt
werden das er sich lenger enthalt vnd vorsehe / studire vnd
bessere / nach gestalt der sachen / vñnd also dan weyther bes
tuffung erwarte.

Welcher Pfarher nun also ein mahl / durch die Su
perintendenten fur tuglich angesehen vnd vff ein Pfar ge
sagt / der sal von ynen des halben ein bekantnis nemenn
vnd haben / Vñnd darnach von seinem dienst vnd Pfar
ten nicht abgesetzt werdenn / es were dan / das er ein laster
das offentpar wurde / beginge / oder so gar vn vleissig vnd
vntrew erfunden / das er an grossen schaden nicht zügedul
den noch vff der Pfar zülaffen were.

Dan wo ein Pfarther oder diener d' Kirchen ein solchen excess there/als offentlichen/thotschlag/Ehebruch/auffrur/volsauffenn/wücherey/diebstal oder dergleichen/vnzimliche handlung/das er on argernis der Kirchen nicht lenger zü leiden/auch der zeit des Synodi nicht zü erwartenn were/als dan so sal ynen der superintendens absetzen/vnd mitler zeit mit wissen seiner nechstgesehen Superintendten die Pfar mit einem andern bestellen biß vff den nechstkunfftigen Synodum in maßen wie obengemelt/

Es sal aber kein Stathalter/Oberamptman/Amptman/Amptknecht/oder wer der seye vber keine Pfarhern/Capelan/noch Prediger/zü gepieten noch zü richten haben/es sey dann das yme hyinnen vnser G. F. vnd N. selbs in eigener person beuelh gethan/oder der prediger in offentlichem laster/als diebstal/Ehebruch/thotschlag/vffrur/vnd der gleychen in warheit befunde wurde/als dan mag man zü yme greiffen/doch on wissen vnnnd beuelh vnser G. F. vnnnd N. gegen seinem leib mit peinlicher rechtuertigung nichts furnemen.

Vnd sal aber ein yeder Stathalter/Oberamptman/Amptman/vnd Amptknecht nichts desteweniger Pfarhern/Capelan vnd Prediger/auch der selbigen güter vnd eynkommen/trewlich schutzen/schirmen vnd hanthaben/Darzü ynen zü inpringung yrer zinse vnnnd gulde/dar von sie sich erhalten müssen/auch zü hanthabung yrer freiheit/ernstlich bestehen/vnnnd wircklich verhelffen/

Es sal auch kein Pfarther/Capelan oder Prediger von den pfar vnd Kirchen gütern/auch yrer person vnd vihes halben züfronen oder zü thienenn schuldig sein/sonder frey gehalten werden/Wetten sie aber bawern oder burger güter ererbt oder zü sich erkauft/dar von sollen sie thün nach gepurnis/in gleichnis sal es auch mit denn Schülmeistern/Opferrnennern vnnnd andern Kirchenn dienern gehalten werdenn.

Im fall aber das ein Pfarther krank/alt oder sünst abstendig wurde/so sal alwege der Superintendens des

selbigen zirkels ein Nachpfarhern ordnen/ welcher vff
ein zimliche belonung des selbigen abtendigen Pfarherns
pfar vnd pfarkinder mit allen dinge / gleich wie sein eigen
pfar versee/bis so lang solchem geprechen radt funde wer-
de / damit der Francke od vnuermöglcher seiner pfar nicht
entfart werden möge/ er hette den sünst von andern geistli-
chen gütern auß gnaden vnser G. D. ein gnügsame ver-
sehung.

Es wil auch vnser gnediger furst vnnnd Herr hinsur-
ther keine pastorey noch pfar / dan allein denen / so sie selbst
besitzen vnd verseeen wollen / verleyhen / Auch keinem ein-
liche absents noch abnutzung hier von züfordern noch zü-
heben gestatt / Was aber in des pfarherns vnderhaltung
vbrig / sal in andern Christlichen prauch gewandt werden.

Auch wil hiebneben vnser G. F. vnnnd herr das sich
kein Strathalter / ober Amptman / Amptman od Ampt-
knecht einichen Pfarhern / Capelan / Schülmeister / Opfers-
man oder der gleichen Kirchen diener an oder abzusezen
vres geuallens vnthernemen sollen / sonnder das sie es bey
diser auffgerichter Ordnung der Superintendenten plei-
ben lassen / vnnnd die selbigen mit höchstem vleis schutzen /
schirmen / vnd hanthaben .

Es hot auch vielgemelter vnser G. F. vnnnd Herr den
frommen trewen Predicanten im Lande disse besondere
gnedige / vertroöstung gethann / das wilche vre Sünne in der
jüngent zü Christlicher lahr vnd furcht instituir / wol vnd
erbarlich erzogenn / man solche vre Sünne in ansehung das
vres Vetter den vnderthanen im Lande trewlich gedient
fur allen andern zü den verordneten stipendijs furdern sal
vff das man auch in zükunfftigen zeiten Pfarhern habens
vnd ein yder getrewer diener d gemein Gottes / seines dien-
stes vnd arbeit auch in seinen kindern / geniesen möge .

Von der Pfarhern vnd Predicanten vnderhaltung .

Es sollen die Superintendenten mit vleis daran sein

Das einer yden pfarren vnd lehens güter vnd eynkomen ei-
gentlich beschriben vnd vnuerruckt / verwarlich / behalten
werden / Auch ein yder Superintendentes dar von ein vor-
zeichnis bey sich haben / vñ mit gangem ernst daruff sehen
das solche güter nicht zerrissen oder von der Kirchenn ver-
euffert werden in keinen weg.

Vnd damit man solchs eigentlich wissen vnd also behal-
ten möge / so wil vnser G. F. vnd N. das was leygende
güter / als acker / wiesen / garten vnd anders seint / solchs als
des die inhaber denn Superintendenten stuckts weisse / wo
vñnd an werne / ein yedes gelegen bey yrem eide / verlust der
güter vnd yrer gerechtikeit / darzu zehen gulden büß vnab-
leslich zübezalen / namhaftig machen vnd eigentlich an-
zeigen sollen / vff das man hiernächst vber Kurtz oder lange
zeit sich darnach richten / solche güter vnzerrissen vñnd vn-
zerteilt bey einander behalten / vnd also ein yeder was den
pfarren züstehe wissen möge / Vnd bey vermeydung obges-
melter straffe vñnd vngnade vnser G. N. dem nichts ab-
preche oder entziehe /

Was aber erwan dein oder gros von solchen gütern /
Fruchten / zinsen / vnd eynkomen der pfarren durch die for-
gen oder stzigen inhaber / auch andere leuth entzogen / ver-
euffert / verruckt / oder zerrissen were / sal ein yeder der solchs
gethan / widerstellen / geben / vnd außrichten bey obgemel-
ter peen vnd büß.

Wie es hinfurter mit der Phar-
ren lenderreyen gehalten werden sal.

Wo die pfarren leygende gütter hetten / die der pfar
eigenthumb weren / vnd andere leuthe vmb jährliche zinsen /
die sie den pfarhern darvon züreichen schuldig weren inhet-
ten / Dweyl dan vntherweylen die selben zinsleuthe in ent-
richtung d zinsse nachlässig seint vñ den pfarhern beschwer-
lich auch an yrem studio vñnd dampft verhinderlich / das
sie dyes zinsleuthe namen vnd die zinsse etwan mit hefftig

freyt eynfordern sollen / zu dem / das die frucht ein Jar besser vnd volkommener wechset als das ander / Damit dan dem Pfarhern als einem fursther der Chrißlichen gemein kein vnwill vnnnd nachrede gepere / so der Zinsman / von dem jar darjn die frucht nit so volkommen vnd wol gewachsen were / dem Pfarhern denn zins fur solln geben solte / Vnnnd also der Pfarher vnd Zinsman in vollem Jar vnnnd den mißwachs yed nach seinem anteil zügliche genießten / So sollen in einer yeden pfar der Superintendentes / Amptman oder Amptknecht / vnd wo stette seint / der Burgermeister am selbigen ort zwischen dem Pfarhern vnnnd dem Zinsman handlen / Das nach anzal der zins / die die zinsleuthe bißher von solchen gütern mit harter vnnnd außgedroschener frucht geben haben / Tun further d Zinsman vnd der pfarher / wan die frucht abgeschnitten vnnnd gebunden ist / vff dem Lande vnnnd felde teilen / vnnnd der pfarher die helffte / das dritte oder vierde seyl / oder so viel vnnnd so wenig als nach gelegenheit des ackers ertragen kan / an stadt des vorigenn zinses / der vnaußgedroschener frucht geualten ist entphahen.

Vnd nach dem nit ein yglicher pfarher wagen vnnnd pferde hot / kunthe man dan mit den zinsleutthen handlen / das sie dem Pfarhern sein teil d frucht heimfurt / das were gut / Wo man aber das bey den zinsleutthen nit erlangenn kunthe / so muß der pfarher sich ym selbigen selbst schicken / Vnd also hette der pfarher auch stro vnd kaben / das er sein vieh desto besser erhalten kunthe.

Wo aber garten / acker vnd wiesen weren / die da neulich bey den pfarhern vn in yrer selbs eigenen handen pflug vnnnd gebrauch gewest weren / vnnnd die Pfarhern mit der condition verlossen hetten / das sie die wan sie wolten wider zu yren handen nemen möchten / sollen auch also in yrer macht pleiben / Wo aber ein pfarher kein acker / wiesen vnd garten hette die er zünorturfft seiner Küchen geprauchenn kunte / vnd begerte eines gartens / einer wiesen zu erhaltung seines viehs vnd ackers zu krauth / die soll vnnnd mag er zu sein handen nemen / Vnnnd aber dargegen dem Zinsman der zins den er daruon gebenn hetten nachgelassen werdenn / hette auch d Zinsman besserung daran / die sal durch ver

stendig hiezü erwelte leuthe taxirt vnd vom Pfarhern
abgelegt werden.

Vnd was einem yden Pfarhern in seinen sachen feelt
oder mangelt/sal er die Amptknecht/vnd wo das nicht
hilfft/den Stathalter/Cantzler vñ Rethen ansüchē/die sol
len yme ernstlich vnd statlich zühelffen schuldig sein.

Es wil auch vnser G. F. vnd N. wo die Pfarhern
nicht gnügsame vnterhaltung haben auß den closter vnd
geistlichen gütern darzū geben vnd ordnen.

Das man in den pfarren bücher zū nütze der kirchen zeugen sal.

Man sal in allen stetten vnd dorffen nach des gemei
nen kassens vermögen alle vnd ein yedes Jar ein zeitlang
für ein guldenn/zwehn/drey/od vier auff höchst rechte güte
nützliche biblische vnd andere d gleichen bücher/sampt der
selbigen Christlicher auslegung/wie solichs d Superinten
dent beuelht/kauffen/reynlich/cynbindē/vñ in die liberey/
wo sie seint/od aber in d Pfarhern gewarsam/wilche man
auch hiezü machen sal/mit kuntschafft libbern lassen/die
selbigē bücher der gemein zū nütze vnd heil geprauchē/reyn
lich vnd verwarlich behalten/vnd einem yeden Pfarhern
beuelen/das er wan er vffzeucht/sein hātgeschrifft daruber
gebe was er für bücher in der libereye oder in sein hāde ent
pfeet/auch in sonderheit den Pfarhern beuelē das sie in die
bücher nit schreiben noch dieselbigen maculieren.

Vnd wo der Pfarther heut oder morgen von seiner pfar
thots oder anderer vsachen halben abginge/sal man von
yme oder den seinen/solche bücher so viel vnd wie er sie ent
phanen/vermoge der hanntgeschrifft widerumb fordern
vnd den baw oder Kassenmeistern libbern.

Wie man es mit den pfarren vnd

Kirchen gütern/so vnther dem Adel
gelegen halten sal.

Es sollen die Superintendenten deren vñ Adel pfar-
ren so on mittel vnther ynen gelegē auch visitiren in maßen
wie oben gemelt/ vnd sollen daran sein/ das geleerte Christ-
liche predicanten bey ynen gesetzt vnd verordnet werden/
vñnd wilcher das vom Adel wegern wurde/ sollen sie vñn-
fern G. S. vñnd herren anzeigen.

Doch sollen die vom Adel/ die Christliche Predican-
ten/ so von den Superintendenten für rechtschaffen vñnd
tüglich angesehen/ zū presentiren vñnd zū belenen / wie das
ein iglicher herpracht/ macht haben/ vñnd sal ynen solliche
verordnung der predicanten an yrer ober vñnd gerechtigkeit
nichts benemen / noch einichen appuch thun.

Von Christlicher Zucht vñnd straff

der Pfarhern vñnd yrer gemein.

Der weg vñnd zūgang / da durch man mit Gottes
hülff zū besserung der ihenigenn / so strafflich seint/ oder in
offentliche lasten erfunden werden / Christlicher nützlicher
weise können vñnd handeln möchte/ ist bedocht das / Zū-
ersten die Prediger als surgennger der Christlichen gemein
sich vnthereināder/ vñnd auch gegen yren Pfarkindern/ des
gleichen die Pfarinder gegē ynen die heimliche Christliche
brüderliche ermanung Matthei 18. angezeigt / auß Gots
furchtigem freuntlichem hertzen anfahren vñ treybe/ Dar-
nach/ wo mā auß Gottes gnaden besserung vñ güte volge
spürete/ vñnd aber sich etliche mit der ersten ermanūg an ge-
meltē capittel Matthei beuolē / nicht corrigirn lassen wöl-
ten als dann auch die andere ermanung daselbs/ in beysein
etlicher güthertziger Christenn / aber alles in geheim für-
neme vñnd auch ein zeit lange tribbe.

Wo dan einer oder mehr von Pfarhern oder Predican-
ten befunden wurde/ der sich nicht daran keren oder bessern
wölte/ den sollen die andern Predicaten von stund an dem
Superintendenten im Synodo anzeigen/ die selbigen wer-
den gegen obgemeltem vngehörsamem noch gelegenheit d
sachen vñ vermöge Gottes worts wol wissen zū handeln/

Wiemans aber mit den Gotlosen vnbüßhaffrigen
gemeinen leuthen / so brüderliche erntanung vielmal ge-
hört vnd doch veracht/bey der tauß vnd des herren nacht
mal halten sal / habenn die Superintendenten beuelh den
Pfarhern vntherichtung zuthun / damit ein yder solichs
der maßen halte/das es zu Chrißlicher einikeit/fried/nutz/
vnd besserung des nechsten dienen möge /

Von iarlichen Synodis ader versamlung der Pfarhern .

Die Superintendenten mögen in yren zircken/ etliche
in stette oder dorffen vnthersetzen / die vff ein zal yrer nach-
pür pfarhern auffsehens haben/wie sie leren vnd leben/vnd
daron darnach dem Superintendenten bericht zugeben
habenn /

Es sal auch ein yeder Superintendent des jars vffs
wenigst ein mal die Pfarhern seines zircks zu sich beruffen/
oder aber an einem gelegen ort zu ynen komen / vnnnd von
nöthwendigen sachen vnnnd geprechen handeln/damit sich
die pfarhern als brüder in Chrißlicher liebe vnnnd einikeit
zusamen halten/einhelliger lere vnnnd ceremonien/ auch teg-
licher zufelliger geprechen / so sich etwan zwischen ynen vnd
yzer gemein zutragen/besprechen vnd vntherreden mögen/
Vnd nach dem allem sollen die Superintendenten alle jar
ein mal zu Cassel oder Marburg/ wo der hoff ist/vnd vn-
ser G. N. am nechste züerlange/vff Trinitatis gegel abent
zusamen komen / vñ ein yeder ein oder zwehn/nach dem es
sich d notturfft halben begibt / d gelerteste vñ geschickteste
pfarhern mit sich pringen / vnd alda des morgens nach ge-
thaner predigt vnnnd gebet/an gelegenem ort/ von allen sa-
chen der kirchenn notturfft belangende/ auch alleley gepre-
chen/so sich ym ganzen Lande des jars vber zügetragenn
vnd vnuerricht piben/einhellige vethörung thun vnd ent-
schiden/ Vnd was trefflichs von newem/züordnen / zübe-
ratschlagen / vnnnd züsetzenn mit vnser G. N. wissen be-
schliessenn .

Es sollen aber die Superintendenten in beyden grä-
ueschafftenn ein yeder nicht mehr dan einen Pfarhern mit
sich vff denn Synodum pringenn/ wilche gleich auch alle
andere dahin geschickt/ von denn particularen Synodis
erwelet vnd verordnet werden sollen.

Von den Schulen /

Die Schulen sal man mit tuglichen/ frommen/ geler-
ten/ Gotasurchtigen leuthen bestellen/vnnd die selbigen in
yres leybs narung vnd notturfft versorge/ da mit sienicht
in yrer arbeit vnd dienst ableßig/faul/vnd vn vleissig/son-
der trew vnd willig behalten werden.

Was sie aber fur ordenung der Institution nach einer
yeden schulen gelegenheit halten/ sollenn die Professores zu
Warpurg ordnen / vnd einer yeden schulen gestelt werden/
damit die Jugend vff eine weise gelert vnnd angehaltenn
werden möge /

Vnd dweyl die arbeit der schulen gros vnd doch höch-
lich von nöthen ist/ sal an einem yeden ort / was die schüler
geben sollen geordnet werden/damit sich die Schülmeister
in yrer leybs notturfft erhalten mögen.

Es sollen auch an allen orten/ da schulen seint/ die pre-
dicanten vleissig anhalten vnd bitten das man die kinder
zur schul halte/ vnd lernen lasse / vnnd den armen schülern
inlendisch vnd außlendisch vmb Gottes willen gebe/ doch
das solichs alles mit ordenung vnnd glimpflicher beschee-
denheit geschehe.

Alhie muß auch etwan ein Capelan in der Stade be-
neben seinem Kirchen dienst/ vmb ein zimlichen zuschub
dem Schülmeister gegen den kindern zur handt sein / vnd
nach dem ein yeder gelert/ tuglich/ geschickt/ müßig/ vnnd
zügebrauchen ist/ pranchen lassen.

Von an vnd absetzung der

Dpferrnner auch yrer vnderhaltung.

Dpferrnner sal d̄ Superintendentens mit radt/wissen vnd willen der Pfarhern vnd Pfarckinder yedes orts bestellen nach gelegenheit /

Es sal aber mit nichts gelitten werden/das die Dpferrnner heymliche oder offentliche lere treibenn/sie werenn dan hiezū tüglich von den Superintendenten vnd Synodo angesehen vnd zūm predigen verordnet.

Auch sal man den Dpferrnnern yre verkaufftreußer vnd abgezogene güter widder zūstellen/vnd yren alten löh geben/damit sie pleiben vnd yres dienstes trewlich warten mögen.

Von denn gemeinen Kasten

Hospitalen vnd Siechenhausen.

Es sollen die Superintendenten ein yeder seines orts ein vleissig auffsehen vff die Kasten vnd der armen vorsehung/das die gehalten werden inhalt der hievor auffgerichter ordnung/vnd also/das der Superintendentens in seiner visitation die armen/so auß dem Kastenn Almüßen nemen/vnd erhalten werden/für sich furdere/It armüt/nöth vñ geprechen/auch wie sie sich geḡ Godt vnd seinem lieben wort/der gleichen gegen yren Nachpurn halten/anhöre/sie erwan yr gebet/glauben/vnd die zehen gebot sprechenn lasse/daruff eine ermanung thū/sich in aller gedult gegen Got vnd yederman vnther yrem Kreuz zūhalten /

Des gleichen sal es auch mit den armen leuthen im Hospitalen vnd Siechenhausen gehalten werden / Das der Distrator auch solche leuthe visiteire vnd vntherweise lere vnd tröste/vnd sich mit vleis erkunde wie sie von yren

Predicantenn des jars vber besücht vñnd in leybs narung
von yrenn furstendern versorgt werdenn / Item ob sie auch
friedlich vñnd einthrechtiglich ynther einander leben vñnd
des gleychen zc.

Vñnd was also mangelt / sal er mit ernst reformiren
vñnd bessern / vñnd so yme das züsichwehcz werdenn wölte /
die obrickait wie gemelt ersüchen,

1563918

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.

Handwritten text, likely bleed-through from the reverse side of the page.